

DANTZA. Dantza barrokoa ere ohoratua izanen da Maitaldian gaur



ANGELA MEJIAS

Marie-Genevieve Masse, L'Eventail konpainiako koreografoa.

XVIII. mendeko bi balet barroko berpiztuak izanen dira gau honetan Miarritzen

L'Eventail taldeak 'Les Elemens' eta 'Don Juan' aurkeztuko ditu

Celine Mounole | MIARRITZE

Arrats honetan, oso emanaldi berezia eskainia izanen da Miarritzeko Kasinoan, 9 orenetan. Izan ere, L'Eventail dantza talde barrokoak XVIII. mendeko bi ikusgarri labor aurkeztuko ditu, *Les Eléments* eta *Don Juan*. «Hautatu dut bi balet horien aurkeztea, XVIII. mendean dantzaren kontzeptzioa irauli baitzuten. Ordu arte, baletak testu batek lagundurik ematen ziren, erran nahi baita ez zuela dantza soilak drama bat jokatzeko. *Don Juan* baleta, lehen ekintza-balet handia izan zen», azaldu du Marie Genevieve Masse dantzari eta L'Eventail taldeko koreografoak. «Hortik aitzina, musika, baletaren elementu garrantzitsuenetarikoa bilakatu zen eta ez zen gehiago laguntzaile hartua. Bestal-

M. GENEVIEVE MASSE

L'Eventail konpainiako koreografoa

«'Les Elemens' eta 'Don Juan' baletak dantzaren kontzeptzioa irauli zuten XVIII. mendean»

de, ondoko balet egileek bi eredu horiei jarraitu zieten».

Bi baleten koreografiak galduak izan ziren denborarekin, eta Massek ditu berriz asmatu. *Les Eléments*, 1737koa, Jean-Fery Rebel musikariaren obrarik ezagunena da. «Dantza horretako koreografia guziz ahanztzia izan denez, saiatu naiz istoriotxo baten asmatzen, hots, eszenario bat, musika horren gainean. Gau magiko batean, gizon bati pertsonaia feeri-

koak, jainkoa, jainkosa agertzen zaizkio, baita uraren, suaren eta airearen alegoriak ere». Bigarren alorrari dagokionez, Don Juan pertsonaia famatuaren gorabeherak aipatzen ditu, eta Christoph Willibald von Glück egileak 1761ean idatzi musika dramatikoak du oinarritzat.

Dantza barrokoa oso guti hedatua da, eta gaur egun 40 bat dantzarik baizik ez dute arte hori pratikatzen. «Francine Lancelotek, nire bultzatzaile ohiak, zuen barrokoa berriz atzeman eta martxan jarri. Hasitapenean, ohizko dantza egin nahi zuen eta, ikertzean, barrokoa deskubritu zuen Akademia Militarretako dokumentuetan. Beraz, Luis XI.aren garaian modan zen dantza mota hori berpiztea erabaki zuen», azaldu zuen Massek.

Arratsaldeko zazpitan, bestalde, Erika *La Quica* dantzariak flamenko garaikideko koreografia bat taularatuko du Coliseon. Erika Winklerren ikusgarrian emaztea da aipagai, bere sentsualitate, feminitate, estetika eta indarrean. «Flamenkoak, alternatiba bat proposatzen du, gure gizartean zabaldua den emaztearen irudiari», koreografoak azpimarratu duenez.

LABURREAN

ARTEA

Nam June Paiken inguruko zinema zikloa eskainiko du Guggenheim museoak



EGUNKARIA
Nam June Paik.

Atzo hasi eta igandea arte, Bilboko Guggenheim museoak Nam June Paiken inguruko zinema zikloa eskainiko du. *Paik eta zinemaren eta bideoaren munduak 1965-1974* izenburupean, pinakotekak Koreako artistaren obraren garapena hobeto ulertzeko ikus-entzunezko pieza laburrak erakutsiko ditu. Fluxus taldearen kide izandakoa, gazte hasi zen bideo artea lantzen, eta gaur egun teknika horren aitzat jotzen dute askok. Guggenheimean ikusgai

LITERATURA

Jaroslav Seiferten obra osoaren erakusketa zabalduko dute, haren mendeurrenean

Jaroslav Seifert 1984an Literatur Nobel saria irabazi zuen poeta txekiarraren obra osoa eta harekin lotutako objektuak biltzen dituen erakusketa zabalduko dute Kralupy nad Vltavou museoan, Pragatik hurbil. Seiferten jaiozaren mendeurrenean antolatutako erakusketan, haren zenbait libururen argitalpen guztiak eta Jirincova, Bouda, Svolinski eta Kristofori bezalako margolarien ilustrazioak erakutsiko dira hilaren 18tik aurrera.

LITERATURA

Jorge Volpi mexikarrak jasoko du Grinzane Cavour - Dos Oceanos saria, Miarritzeko La Cita jaialdian

Jorge Volpi idazle mexikarrak *En busca de Klingsor* liburuarekin irabazi du Grinzane Cavour-Dos Oceanos saria. Miarritzeko La Cita jaialdiak sortu zuen sari hau, Dos Oceanos izenarekin, orain dela zortzi urte, Latinoamerikako literatura Frantzian ezagutarazteko. Iaz Italiako Grinzane Cavour sariarekin bat egin zuen. Eduardo Manet idazle kubatarra buru zuen epaimahaiak Volpiren liburua hautatu du aurtengo ekitaldian. Carlos Fuentesen ustez, gaztelaniazko egungo literaturaren izar nagusietako bat da Jorge Volpi.

ARTEA

Duela mila urteko mural bat aurkitu dute Tibeteko Sagyako monastegian

Txinako arkeologoek duela mila urte egindako mural bat aurkitu dute Sagyako monastegian, Tibeteko hego-mendebaldeko eskualde menditsu batean. 190 metro koadroko bi solairu hartzen ditu muralak, eta Budaren irudia erakusten du, mendi, erreka, animalia, txori, lore eta hodeiz inguratuta. Mogaoko leizeetako pinturak bezain ederrak direla esan dute arkeologoek.

MUSIKA

Musika Banden III. Alardea egingo da asteburu honetan Irunen (Gipuzkoa)

Irun, Lizarra, Alcañiz (Teruel), Almanzora (Almería) eta Hondarribiko musika bandak elkartuko dira asteburu honetan III. Irun Hiria Alardean. Larunbat arratsaldean desfilea egingo dute Irungo kaleetan zehar, eta ondoren Udalak harrera egingo die. 19:30ean kontzertu bat eskainiko dute Artaleku kiroldegian. Igande goizean berriz egingo dute desfilea, Alberto Anguera plazatik abiatuta, eta La Milagrosa kaperan amaituko da ibilaldia.

ARTEA

Arte Latinoamerikarreko Museoa zabalduko dute Buenos Airesen, jabetza pribatukoa

Datorren astean zabalduko dute Buenos Airesen (Argentina) Arte Latinoamerikarreko Museoa. Eduardo Costantini enpresariaren bildumako 228 obrak osatzen dute museoko bilduma iraunkorra. Horien artean preziatuenak bi dira, Tarsila do Amaral brasildarraren *Abaporu* eta Frida Kahloren *Autorretrato con chango y oro*. 30 milioi dolarreko inbertsioa egin du Costantini Fundazioak.

IRAGARKI MERKEAK 943 300 222

ETXE BAT SALGAI.

Nafarroako herri euskaldun batean: 961 m2 eraikiak, 9 logela, 2 egongela, 2 sukalde eta abar. Familia luze edo tade batentzat egokia. **Telefonoa: 948 50.31.55.**

33 x 33 mm MODULOAK (Edizio orokorra)

Eguna: **3.000**
Astea (6 egun): **2.300**
2 aste (12 egun): **2.100**
Hilabetea (24 egun): **1.500**